

KERATAN AKHBAR

TARIKH : 18 JANUARI 2023
AKHBAR : BERITA HARIAN
MUKA SURAT : 3

Perluas kerjasama kerajaan, Media Prima

Perluas kerjasama kerajaan, Media Prima

Putrajaya: Kerjasama kerajaan dan media termasuk dengan Kumpulan Media Prima Berhad (Media Prima) berfungsi membentuk masyarakat berinovasi dalam aspirasi menganjakkan negara ke ekonomi bernilai tinggi.

Menteri Ekonomi, Rafizi Ramli, berkata ketika ini, ada beberapa idea yang bakal dipanjangkan dalam perbincangan lanjut bersama-sama Media Prima.

Beliau yang menerima kunjungan hormat kepimpinan kanan Media Prima, diketuai Pengerusi Kumpulan Media Prima, Datuk Seri Dr Syed Hussian Aljunid, di pejabatnya, petang semalam, turut membincangkan beberapa agenda ekonomi nasional.

“Saya mengucapkan terima kasih kepada keseluruhan kepimpinan Media Prima yang hadir pada hari ini (semalam).

“Kita bincangkan mengenai beberapa agenda ekonomi nasional. Contohnya mengenai bagaimana peranan yang kita boleh mainkan di peringkat kementerian dan disambut oleh Media Prima untuk membentuk masyarakat yang berinovasi dan untuk kita anjakkan daripada ekonomi yang kita ada sekarang ke ekonomi bernilai tinggi.

“Kita perlu hasilkan budaya itu dalam masyarakat,” katanya selepas kunjungan hormat di pejabatnya di Menara Prisma, di sini.

Yang turut hadir, Pengarang Urusan Kumpulan NSTP yang juga Pengarang Kumpulan BH, Datuk Ahmad Zaini Kamaruzaman; Ketua Pegawai Eksekutif, Rangkaian Televisyen Media Prima dan Primeworks Studios, Datuk Khairul Anwar Salleh serta Pengurus Besar Kumpulan, Jabatan Komunikasi Korporat Kumpulan dan Pejabat Pengerusi

Kumpulan, Azlan Abdul Aziz.

Rafizi berkata, turut dibincangkan beberapa perspektif ekonomi yang membabitkan rakyat.

Beliau berkata, ia berikutan kerajaan ada dasar namun perkara itu perlu juga disambut dengan baik oleh rakyat dalam beberapa perkara.

Justeru, katanya, media seperti Media Prima ada peranan yang cukup penting memastikan kerajaan dan masyarakat serta industri bergerak ke arah yang sama.

Manfaat peluang kerjasama

Sementara itu, Ahmad Zaini berkata, kunjungan rasmi itu antara lain membincangkan bagaimana Media Prima boleh menjalinkan kerjasama dengan Kementerian Ekonomi, dengan ia memberi manfaat kepada kedua-dua pihak.

“Alhamdulillah kita mendapat maklum balas yang amat positif daripada pihak menteri bagaimana kita boleh membantu pihak menteri melaksanakan program yang dalam perancangan mereka, secara bekerjasama dengan Media Prima.

“Insya-Allah, selepas ini kita akan ada lagi perbincangan untuk memperincikan butiran lanjut mengenai program yang boleh kita jalinkan bersama dengan Kementerian Ekonomi,” katanya.

Ahmad Zaini berkata, Rafizi turut berminat untuk menyahut jemputan Media Prima meninjau operasi kumpulan itu.

“Sudah tentu setiap kali kita mengadakan kunjungan hormat dengan menteri kita akan menjemput.

“Yang Berhormat Menteri pun tadi (semalam) berminat untuk datang dan insya-Allah kita akan uruskan lawatan itu nanti,” katanya.